

Ioni Ya Iginuma V'-inuana

Buki Taina Wayahina

Tomotau habuhabui ivitumahana buki taina a tau ginuma Sebedi natuna ana wava Ioni, Iesu a tau hae ananina aitam. Tauna mani buki kadu mani leta ginumi *Awaeha Vovouna* taina nihenina.

Ka leta taina a pai mini aitam vivane dewa-vidovidoha kadu vona tunutunuhina etawana aitamoata wayahina kavaniahei. Ka Ioni itoka tau ekalesia nau-vi-avinika tau viwavenena vitupu wayahi. Ka tauna voneka itoka tau ekalesia nau-wawanika kavitumahanei Iesu vi-tomotau itoka tomotau deinake. Tauna ininina ininika deina. Ka kadu Ioni voneka nau-wawanika yaka vitumahana naona kanua-vi-avini, eha tuta tuta kavo-vinevine.

Pai Vi-putu

¹ Yauke avaha avi-nainai. Ka yami leta taina aginumi omomo wamike wayahimia kadue natunatumi habuhabui wayahia. Yaubada vi-nua-dadanemi, iuna ya nuanua yawai-vavaha uvaniahei. Ka yauke Ioni, aitam tau dune-vi-avina ekalesia nihenina. Ka adewa-vidovidohemi vona tunutunuhina nihenina. Ka kadu tau habuhabui vona tunutunuhina idewa-vidovidohei, tau kadue idewa-vidovidohemi. ² Iuna vona tunutunuhina

nihenikaia mamaei, kadu wayahikaia na-ma'-vavaha deina.

³ Ka am-venena awawaehina, kadu ate-nuanuai, ka kadu nua gomagomanina kavaniahei Yaubada Amaka wayahina, kadu tauna Natu-hoina Iesu Tau Ito-yavuha wayahina. Ka dewaia kavaniahei vona tunutunuhina nihenina, kadue dewa-vidovidoha nihenina.

Vona Tunutunuhina Kadu Dewa-vidovidoha

⁴ Yauke adewa-haiawa ananina, iuna natunatumi tupwai vona tunutunuhina inononi kadue idedewei, Amaka veimeyeka kadedewei deina. ✧ ⁵ Wayahina ataina, vavinemi, ami veimea aginumi vivane habuhabuka nau-wawanika kadewa-vidovidohika. Veimeana eha vovouna, kate tuta naona a itoava tuta ataina wayahina, veimeana wayahikaia mamaei. ✧

⁶ Ka dewa-vidovidoha an' anamana taina. Nau-wawanika Yaubada ya veimea kavi-ateteyei. Nonova veimea tanoi ananina unononi, vivane nau-wawanimi tomotau udewa-vidovidohi.

⁷ Tau viam-nonona habuhabui avaha iyavuyavuta tanopia papani aitamoata aitamoata wayahia. Taii eha it'-awaehe Iesu Tau Ito-yavuha vi-tomotau. Ka kadu eha it'-awaehe Iesu avaha omo tanopia. Wayahina, taii habuhabui tau vitupu, ka vona ahiahina, taii vivane yaka Tau Ito-yavuha a havia. ✧

⁸ Wayahina, itomi taumi nau-wawanimi udune-vivinimi! Aituhu tau vitupu yai viam-nonona unononi, ka aituhu uvitumahanei, munia yawaimi ivi-goyoi. Kate avonemi avi

✧ 1:4: 3Io 3. ✧ 1:5: 1Io 2:7. ✧ 1:7: 1Io 4:1-3.

paisewa avaha Yaubada wayahina upaipaisewa, akanai paisewa-naia ai nau-pata ahiahina potapotami. Wayahina, eha ami nau-patana uhapone-kavokavovo, kate ugwagwaheyei, e apaina uvaniahe. ⁹ Aituhu aviyaivia Iesu ya viwavenena ini-tawanei, ka aituhu ivi-putu mani viwavenena ivi-munie, tau eha Yaubada nihenina ita-mamae. Kate aituhu aviyaivia Iesu ya viwavenena ivi-muni-waiwaiei, akanai tau Yaubada kadu tauna Natu-hoina ainua nui imamaei. ¹⁰ Wayahina, aituhu aviyaivia iomomo wayahimia, kate aituhu eha Iesu ya viwavenena iviwavene, akanai ami veimea taina, eha unau-kaiwa wayahia, ka kadu eha yami manua un'-awaehe nui umamae. Kadue eha una-vona wayahia, "Yau nuanua nua gomagomanina uvaniahe Yaubada wayahina." ¹¹ Aituhu tau vitupu-naia unau-kaiwei, vona ahiahina, taumi avaha uaivaitei tau yai dewa goyona idedewei.

Pai Nau-yehata

¹² Vona habuhabuna mamaei, kate eha yau nuanua aginumi wayahimia yami leta taina nihenina. Kate yau nuanua an'-omo wayahimia, e matakaia kanau-basekwa, e kadewa-haiawa-iaua deina.

¹³ Yaubada kadu vaneimi vi-nua-dadanei yawai-vavaha ivaniahe, e vaneimi natunatui habuhabui yai nau-kaiwa iva-tawanei iomomo wayahimia.

Ana pata deina.

Yauke Ioni

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 11 Nov 2022 from source files dated 9 Oct 2020

b67aeef-7e9d-566a-9ff5-cb22ab7e2ea4